



Gabinete Wever - Croes II

# ISLAONLINE


Noticia di Gobierno

2023

Diaranson 5 Juli 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





**Prome Minister Evelyn Wever-Croes:**  
**Den e ultimo dia di Conferencia di Prensa Hubenil di 'Periodista pa un Dia' 2023**  
**PROME MINISTER TA GRADICI TUR ESNAN CU A**  
**HACI E PROYECTO AKI ASINA BUNITA**  
**"Ohalá cu sali gran priodistanan di esaki den futuro"**

Diabierna atardi a tuma luga e ultimo Conferencia di Prensa Hubenil di 'Periodista pa un Dia' 2023 den sala di conferencia di prensa di Gobierno di Aruba. Un total di 31 mucha a participa y a siña conoce nos Premier di Aruba, Evelyn Wever-Croes un tiki mas dunando tambe asina pueblo conoce un tiki mas di bida, profesion, estudio, famia, hobby y deseo pa un miho Aruba di nos Prome Minister. Tambe e muchanan a conoce mas di cerca cu e trabou di prensa na Aruba. Otro siman diabierna, e muchanan cu a participa lo bishita TeleAruba pa wak kico tur TeleAruba ta haci riba e tereno di periodismo pa mantene nos pueblo informa y entreteni.



Sandra Croes, e cara contento yen di positivismo cu ta habri cada conferencia di Gobierno di Aruba, a expresa na e muchanan cu pa haci e trabou aki, semper mester tin un smile na bo cara y mas ainda den bo curason. Esaki ta refleha riba e amor cu tin pa haci e trabou. Y e conseho cu Sandra a duna e muchanan ta, pa stima tur loke nan ta haci cu ta bon. Cada trabou cu nan haci cu gusto y amor y yen di positivismo, cu un sonrisa na nan cara y den nan curason, ta un paso mas pa logra nan futuro briyante.

Cada siman un periodista di TeleAruba a presenta y a splica e muchanan mas di e trabou di ta un periodista. E siman aki, señora Siomara Everon tawata nos periodista invita. Siomara no ta un personahe desconoci pa Aruba. E tin un trayectoria hopi amplio den e mundo di prensa. Un hende muhe cu a realisa su ambicion di niñez pa bira un periodista. Cu su 18 aña Siomara a haya e oportunidad di traha na radio lesando noticia. Siomara a traha pa diferente medio di comunicacion na Aruba eherciendo diferente posicion entre otro, coordinador di redaccion, productor y presentado y tawata tin su programa

pa hende muhe. E entrada di Siomara na TeleAruba tawata un logro na 1996, unda cu el a haya e oportunidad di presenta y produci Actualidad, un show periodistico investigativo danki na señor Norman Thijsen cu a wak potencial den dje. Na Aña 2000 Siomara oficialmente ta haya oportunidad di drenta Tele Aruba como news Anchor y news reporter. Y na 2009 Siomara a join Nos Mainta caminda e ta produci y host e show di mainta te awe, 14 aña den aire. Mientras tanto Siomara semper mi a keda studia mientras e ta traha y a logra realisa varios diploma y curso den journalistiek y comunicacion social. Siomara su conseho pa nos muchanan ta pa sigui nan soño, sigui studia y pensa semper cu nunca ta mucho tempran cu cuminsa realisa e trabou di bo soño.

E hobennan Izabella Yung, Evanee Isabella Fuentes, Maerd Farro, Roxanne Rasmijn, Xiany Paesch, Iva Werleman y Luciana Isabella Willems cu hopi alegria y emocion a bishita Prome Minister den su oficina y den sala di Consejo di Minister na unda nan a haya oportunidad pa scucha kico tur ta pasa den e Consejo di Minister y a haya oportunidad tambe pa saca un potret cu Prome Minister.



## Continuacion PROME MINISTER TA GRADICI....

Despues a sigui e Conferencia di Prensa Live. Prome Minister a contesta tur pregunta cu e muchanan a haci na su persona y pueblo di Aruba por a disfruta esaki tambe Live via TeleAruba y riba pagina di Facebook di Gabinete Wever Croes 2. Prome Minister a expresa na e muchanan cu e ta aprecia hopi mes cada pregunta aunke, Prome Minister a bisa contento, tawata tin algun pregunta 'moeilijk' pero cu placer el a contesta tur. E conseho cu Prome Minister a laga pa e muchanan ta pa semper prepara y haci nan pregunta sin miedo, sin importa con critico e preguntanan ta. "Mi ta spera cu boso ta hiba un bon recuerdo di e programa aki y ohala cu sali gran priodistanan di esaki den futuro", Prome Minister a expresa.

Den number di Gobierno di Aruba, Prome Minister ta gradici tur esnan cu a haci 'Periodista pa un Dia' posibel y un exito un biaha mas. Danki tambe na TeleAruba y señora Siomara Everon pa su tempo pa splica nos muchanan mas di e trabou pa informa pueblo. Danki na e mayornan pa permiti nan yiunan participa y danki special na nos muchanan cu a participa.







## ESFUERSONAN PA INTRODUCI CAPTURACION DI CARBON DEN AVIACION



E industria di aerolinea ta experimentando cu cambianan structural importante pa construi un futuro cu menos impacto ambiental. Awendia, hopi aerolinea renombra manera KLM, American Airlines, British Airways y Singapore Airline ta ofrece nan pasaheronan e posibilidad pa compensa boluntariamente nan “carbon footprint” durante nan vuelo.

Dia pa dia consumidornan ta vocifera nan preocupacionnan mas y mas relatando e impacto riba medio ambiente ora di biaha. Cu esaki aerolineanan mester a cuminsa adapta y implementa programanan di compensacion di carbon cu nan ta produci. Na Aruba, nos tambe ta trahando duro pa introduci e oportunidad pa companianan compensa nan “carbon footprint” pa medio di un programa di ‘Captura di Carbon’, cual lo presenta beneficianan economico pa nos pais.

Pa logra esaki nos mester cuida y proteha nos ecosistema entre otro mondi di mangel, esta mangroven, pasobra no

solamente nan ta evita erosion na nos costa, pero tambe ta absorba nutricion y mas ainda nan ta capta cantidad masivo di emision di CO<sub>2</sub> y otro gasnan di tera y secuestra carbon for di e aire.

Ademas di e beneficio di mata di mangelnan, yerba di lama (seagrass) ta traha man den man cu e mangelnan mirando cu nan tambe tin un papel vital den preveni erosion na nos costanan y captura CO<sub>2</sub>. Yerba di lama ta complimenta e esfuersonan di e mangelnan pa crea un ecosistema resiliente y sostenibel. Nan dos ta forma un aliansa poderso pa proteha nos costa y preserva biodiversidad pa mitiga e impacto di cambio climatico.

Na Aruba nos ta comprometi pa innova ora conecta mundo cu nos isla y awo mas cu nunca ta importante pa nos desaroya den manera sostenibel.





## PAIS ARUBA TA RICIBI ARCHIVONAN COLONIAL DEN FORMA DIGITAL



Riba 1 di juli 2023 durante e acto conmemorativo di 160 aña di abolicion di sclavitud den Reino Hulandes, archivonan colonial digital cu ta inclui historia di nos pasado di sclavitud a wordo traspasa for di Hulanda pa Aruba. Minister di Cultura Xiomara Maduro a ricibi for di Secretario di Estado di Husticia y Siguridad sr. Eric van der Burg, documentonan cu ta data for di 1828 te cu 1845. Na su turno, Minister Maduro a entrega esaki pa sr. Edric Croes cu ta encabesa e departamento di conservacion y preservacion na Archivo Nacional Aruba (ANA).

Un alrededor di 70 mil scans di documentonan a wordo pasa riba un harddrive y esaki a wordo entrega diasabra ultimo na Minister Maduro. E scans ricibi lo wordo haci accesibel door di Archivo Nacional Aruba riba e plataforma di coleccion.aw y lo aplica e tecnologia di HTR pa haci e documentonan digital mas facil pa nabega.

E traspaso di e archivonan aki ta importante pa Aruba y nos herencia cultural especialmente considerando cu e ta trata di documentonan tocante nos antepasadonan. Manera sr. Edric Croes di ANA ta indica, e archivonan aki tin un conexion y laso familiar. Sin e documentonan aki, nos no por forma un bista completo tocante nos historia. E informacion aki ta esencial pa compronde e historia unico di nos pais durante un periodo unda cu colonista Europeo, Amerindio y catibo di West-Africa a mescla y asina a forma un poblacion nobo di habitante riba



nos isla.

Minister Maduro a indica durante e traspaso di e archivonan cu 1 juli 2023 ta marca un dia historico unda cu nos ta para keto y honra nos antepasadonan. E traspaso di archivonan ta simbolisa un acuerdo mutuo entre Hulanda y Aruba pa debolbe nos archivonan bek na nos cas. Minister Maduro a gradici Secretario di Estado van der Burg y a finalisa bisando cu e pasado di sclavitud den Reino Hulandes y na Aruba ta un historia comparti: e ta di nos tur. E archivonan cu nos a ricibi ta conta e storianan di esnan cu a biba y experencia e periodo di sclavitud riba nos isla. A base di e informacion ricibi nos por honra nos antepasadonan, comprende nos presente y traha riba e sanacion necesario pa fiha riba un miho futuro pa nos mes, como pais y como Reino.





## REUNION CU SRA. ALEXANDRA VAN HUFFELEN ENCUANTO ARUBA FAIR TRADE AUTHORITY

Minister di Asuntonan Economico, sr. Geoffrey Wever, hunto cu directora di Departamento di Asuntonan Economico, Sra. Maria Dijkhoff - Plta, a reuni cu Secretario di Estado Alexandra van Huffelen. Durante e reunion aki e topico central tabata e Aruba Fair Trade Authority (AFTA). Aki Sr. Albert Scholten, kende ta e persona encarga cu e implementacion di e Aruba Fair Trade Authority, a duna informacion di e diferente stapnan cu ta tumando pa cu implementacion - unda nos ta y kico falta ainda.

Tambe a ilustra e diferente retonan cu mester surpasa, no solamente pa implementacion pero tambe como un organisacion cu lo ta creciente den tamaño, trabounan y tambe di importancia dentro di e clima empresarial di Aruba. AFTA lo tin un rol importante pa segura cu e consumidor ta protegi contra practicanan indesea di parti di comercio, y lo enfoca entre otro riba competencia husto y limita practicanan abusivo di mercadeo, prijs of servicio contra consumidornan.

Colaboracion dentro y cu partners externo di e Reino Hulandes lo ta sumamente importante pa establece protocolnan, y cooperacion por ehempel entre ACM, FTAC; ICN. Mester por segura cu ora AFTA inicia, por funciona optimalmente mas lihe posibel, siñando for di miho practicanan ("best practices") internacional, mientras aplicando regulacion specialmente diseña pa e clima (tamaño) empresarial di Aruba.

"Deadline pa implementacion di bureau y bestuur ta 2023, y ta canando riba schedule", segun Sr. Scholten. Actualmente ta den proceso pa busca personanan pa e diverso vacaturanan.



Ta importante pa nota cu AFTA ta un di e puntonan di implementacion cual ta stipula den e landspakket, "un logro" den bista di minister Geoffrey Wever, expresando riba e importancia di un autoridad manera AFTA y su significancia pa e consumidor y clima empresarial di Aruba.

Minister Wever ta contento di e atmosfera ameno y al caso di e reunion, y ta positivo di mas futuro colaboracion dentro di Reino pa cu implementacion di AFTA.





# MINISTER ENDY CROES A CENDE E LUZNAN NOBO DI INTERNATIONAL RACEWAY PARK PALO MARGA



Diasabra atardi, despues di varios luna di trabou a cende e luznan di International Raceway Park Palo Marga. Minister Endy Croes a hiba palabra y cende e luznan pa asina duna inicio oficial na e caredanan di Aruba Summer Nationals. Un momento sigur historico y un proyecto tan anhela pa tur e coredonan di e deporte di drag race.

Minister Endy Croes a indica cu pista di Palo Marga pa mas di dies (10) aña no a haya atencion. Gobierno di Aruba a inverti den 26 poste di luz LED pa Palo Marga. “Ta nos compromiso pa laga deporte avansa y Gobierno di Aruba ta invertiendo den tur nivel di deporte pa bienestar di tur deportista”, Minister Endy Croes a expresa.

Minister Endy Croes a priminti di haci e maximo esfuerso pa por haci un “recap” di e pista di Palo Marga. Ohala cu por logra e “recap” di e pista pa final di 2024 of comienzo di 2025.

Minister Endy Croes a añadi cu aña pasa, a ricibi bishita di Sr. Kurt Johnson di Total Venue Concepts, un profesional den e preparacion di pista di “drag racing” na Merca, pa evalua kico tur mester haci pa e pista di Palo Marga wordo certifica. Sr. Johnson den su carera a atende cu hopi pista di drag race rond mundo y tin conocimiento y experticio amplio pa evalua, midi, bora, analisa pista y duna un rapport final. Minister Endy Croes a indica cu el a ricibi e rapport caba, pues ta trahando duro pa pronto Palo Marga por tin un pista nobo y certifica pa e proximo 10 aña pa careda internacional. Mandatario di Deporte a agrega cu un pista ta costa hopi placa pa mantene, pero directiva, ekipo- y coredonan y tur hende cu ta stima e deporte aki ban hunto traha un plan pa nos por logra mantene e pista aki tambe pa futuro pa asina nos tur por disfruta di dje.

Por ultimo, Minister Endy Croes ta gradici Gobierno di Aruba, Lotto pa Deporte, Sr. Anthony Irausquin y Sr. Richard Geerman di Elmar, Sr. Sjors Beek di Time Line Services, Sr. Alwin Boekhoudt, Sr. William NG y ekipo completo di Quick Electrical, Sr. Joy Werleman, Sr. Richard Every y Sr. Sam Kwidama di



ABM, Quebero Sandblast, Tattfat, Ministerio di Deporte y tur hende cu a traha hunto pa logra e proyecto aki. Minister Endy Croes ta felicita e coredonan y fanaticada grandi di e deporte di drag race cu e logro aki. Pabien na e deporte di drag race y danki na tur cu a haci e proyecto aki posibel.



# MINISTER ENDY CROES TA FELICITA E GRADUADONAN DI JULIANA SCHOOL

Diasabra anochi, Minister Endy Croes a atende e fiesta di graduacion di Juliana School. Durante e ceremonia Minister di Enseñansa Endy Croes a duna un discurso felicitando e graduadonan. E aña aki Juliana School tin un motibo extra pa celebra ya cu e scol tin e miho porcentahe di graduado di MAVO na Aruba. Juliana School tin un total di 97% graduado. E miho graduado di 7 materia ta Frederick Lobbrecht y e miho graduado di 6 materia ta Kiandra Gomes.

Durante e anochi special aki a despedi di Sr. Clyde Roga cu ta bandona enseñansa despues di a traha 27 aña na Juliana School como docente di e materia Natuurkunde. Minister Endy Croes a gradici Sr. Roga y den nomber di Gobierno di Aruba a entreg' e un roconocemento di aprecio pa e dedicacion y profesionalismo durante 27 aña den enseñansa di Aruba. Minister Endy Croes ta felicita cabesante Sra. Paula Croes, docente- y mayornan pa sostene e alumno durante e trayecto aki. Finalmente, den nomber di Gobierno di Aruba e mandatario di enseñansa ta felicita tur graduado y ta desea nan hopi exito den futuro!





# MINISTER ENDY CROES TA FELICITA E 30 GRADUADONAN DI IPA

**A dedica atencion na e 11 graduadonan di Wayne State College**



Diamars anochi, Minister di Enseñansa y Deporte Endy Croes a atende Graduacion di Instituto Pedagogico Arubano (IPA) na e ballroom di Hyatt Place Aruba Airport. Minister Endy Croes a duna un discurso y a felicita e graduadonan di IPA di año 2023. E año aki IPA a conta cu un total di 30 graduado, esta 18 graduado di Estudio pa Maestro di Enseñansa Primario, 5 graduado di Bachelor Nederlands als Vreemde Taal, 3 graduado di Pedagogisch Didactisch Getuigschrift (PDG), 2 graduado di Movecion y Salud y 2 graduado di Bachelor Papiamento.

Ademas di esaki, durante e anochi aki a dedica atencion na e 11 profesionalnan cu a gradua di Wayne State College y a ricibi nan diploma den Master of Science in Education (MSE). E estudio aki tabata un combinacion y colaboracion di Instituto Pedagogico Arubano y Wayne State College. Minister Endy Croes a indica cu esaki ta ehempel bibo di e cuater (4) C-nan di habilidad di siglo 21, cual ta para pa comunicacion, colaboracion, pensamiento critico (critical thinking) y creatividad. Minister Endy Croes ta desea tur graduado hopi exito cu nan carera como docente.





# MINISTER ENDY CROES A BISHITA DIFERENTE UNIVERSIDAD NA ORLANDO Y A FIRMA MOU CU FLORIDA INSTITUTE OF TECHNOLOGY

**A reuni cu e representantenan di University of South Florida pa  
negosha posibel acuerdo den futuro**



Dia 28 di juni 2023, Minister di Enseñansa y Deporte Endy Croes a sali pa un biahe di trabou hunto cu rector di Universidad di Aruba Sra. Viola Heutger y Minister Plenipotenciario na Washington Sra. Joselin Croes pa Orlando, Florida. Durante e biahe di trabou na Orlando a firma Memorandum of Understanding (MoU) cu Florida Institute of Technology (FIT) Alabes, a reuni cu Sr. cu e representantenan di University of South Florida (USF) pa negocia posibel acuerdo den futuro.

E acuerdonan aki ta brinda oportunidad na e studiantenan di Aruba pa eherce un estudio na Orlando na un tarifa hopi mas abou (schoolgeld). Además di esaki, Minister Endy Croes a probecha e biahe di trabou aki pa reuni cu estudiante di Aruba cu ta eherciendo un estudio na Valencia College. E studiantenan di Aruba a comparti nan experiencia di estudio na Orlando y a duna algun conseho na esnan interesa pa studia aya.

Minister Endy Croes a indica cu e tabata un tremendo biahe di trabou, unda a firma un (1) acuerdo beneficioso pa nos studiantenan di Aruba. Pa finalisa, e mandatario di Enseñansa ta gradici tur esnan cu a contribui pa realisa e acuerdonan aki. Hunto nos ta logra! Pabien Aruba.





## Minister Endy Croes: A FIRMA UN MOU BENEFICIOSO PA NOS STUDIANTENAN DI ARUBA CU FLORIDA INSTITUTE OF TECHNOLOGY

Diabierna mainta, Minister di Enseñansa y Deporte Endy Croes hunto cu rector di Universidad di Aruba Sra. Viola Heutger y Minister Plenipotenciario na Washington Sra. Joselin Croes a reuni cu e representantenan di Florida Institute of Technology (FIT). Durante e encuentro a dialoga riba futuro colaboracion entre Gobierno di Aruba y FIT y e necesidadnan educacional di e studiantenan di Aruba. Despues di esaki, a firma un Memorandum of Understanding (MoU) cu FIT. E acuerdo aki ta beneficia e studiantenan di Aruba cu ta desea di eherce un estudio na FIT, mirando cu ta haya un descuento riba e tarifa di scol (schoolgeld).

Minister Endy Croes a indica cu ademas cu mr. Brian Ehrlich y henter e staf di FIT ta brinda nos diferente oportunidad den tecnologia, tambe nan kier duna Aruba sosten pa duna lectura na Aruba pa crea oportunidad pa hiba e studiantenan aya. Minister Plenipotenciario na Washington Sra. Joselin Croes a indica cu di hopi tempo caba ta negoshando cu e scol aki, pa motibo cu e ta relativamente chikito y esaki ta locual mayoria di nos studiantenan di Aruba ta busca. Tambe, Minister Joselin Croes a señala cu ainda no tin un suma concreto di e beca cu e studiantenan di Aruba ta bay haya di FIT, pero si a acorda cu ta bay mantene e suma bou di 18 mil dollar, mirando cu esaki ta e suma cu e studiantenan ta haya di Arubalening anualmente.

Fin di e luna aki Minister Endy Croes lo ricibi di informacion esaki y lo anuncia e tarifa di scol pa e studiantenan di Aruba. Presidente di FIT, Sr. John Nicklow a expresa cu e studiantenan di Florida Tech ta extremadamente talentoso. Sr. John Nicklow a indica cu e ta kere cu e acuerdo cu a firma awe cu Gobierno di Aruba ta e base di algo mas grandi unda por establece talento. Sr. Brian Ehrlich, "Vice President for Enrollment Management" di FIT ta expresa cu FIT ta un campus internacional cu studiantenan di mas di 110 pais. Florida Tech na Melbourne ta conta cu un total di 4000 estudiante. E estudionan cu FIT ta ofrece, ta estudionan cu actualmente Aruba no tin.

Pues, e studiantenan di Aruba ta wordo educa den e ramo aki y por hiba e conocimiento aki bek pa Pais Aruba y contribui den e desaroyo di Aruba. Minister Endy Croes ta gradici Minister Plenipotenciario na Washington Sra. Joselin Croes y tur e personanan cu a contribui pa haci e acuerdo aki posibel. E logro aki ta pa nos studiantenan di Aruba! Nos ta desea tur esnan cu ta bay eherce un estudio na FIT hopi exito!







Desaroyo y progreso di un pais ta mas  
sostinibel, fuerte y lihe ora cu cada  
ciudadano di e pais uni den esfuersonan  
y contribui cu positivismo na e vision  
pa logra cosnan grandi pa futuro.

2023 AÑA DI UNION Y POSITIVISMO! \_\_\_\_\_